

雪樵遺稿

二冊之一

光緒歲在甲申

聽雨樓雪橋遺稿

江苏工业学院图书馆藏書章

含光堂藏板

聽雨樓雪樵遺藁序

人未有素昧生平忽思求其人而傳之者也亦未有素昧生平忽思人之傳之者也蓋旣曰素昧生平先不知其所爲人安在而傳其人旣曰素昧生平且不知其人安在而望其人之傳雖然傳在是矣吾邑王秀才雪樵與余初未相聞名歲己卯訪求先曾祖夢鶴軒詩鈔或曰在雪樵處因得晤雪樵窮老且病瀕危中出所著聽雨樓詩一卷見示且乞刪定始知雪樵固吾遼詩人攜以歸歸後不十日雪樵死死且無後遺藁存余處無

可歸凡五稔謀之同人且付梓因有感焉雪樵之付余
詩也將待余以爲之傳耶雪樵方不知余安知余之傳
其詩雪樵無望傳之心可知也余以詩鈔故而晤雪樵
方不知其能詩安望而傳其詩余無求其詩而傳之之
心又可知也雪樵未嘗望傳余又未嘗求傳其詩乃無
端而詩付余無端而詩付余而死此其中蓋有天焉夫
人之一生行習日用皆無可殫述其性情學問必有精
力所在之處顧當其生也或不甚惜及其旣沒則珍之
重之欲爲什襲而呵護之又或付之荆棘之歎人琴之

悲而天必不欲其湮沒也於是於其將盡未盡之際特
畀一人焉以承其將墜之緒爲之哀其志而憐其衷故
生平區區之望什一之存往往親我愛我之人皆若疏
邈而無所用其傳我之人轉在數語相交臨終一面情
誼不屬年齒又差先之不能後之不可竟若有延吾生
以待之者豈偶然哉豈偶然哉昔仲翔氏之言曰使天
下一人知己者足以不恨雪樵其許我乎詩旣傳謹序
其得傳之由如左至其爲詩大旨具見於卷中讀長慶
集仿香山體諸作雪樵固已自言之茲不復贅光緒十

年歲次甲申鞠有黃華之月後學東霖繆裕紱序於瀋陽之含光堂

聽雨樓集成題此誌感

末路英雄泣數行酒酣拔劍憶王郎家饒債累從知苦
筆寫愁多不損狂黃卷祇餘窗聽雨青衫已是鬢成霜
誰知竟緩須臾死待我來收古錦囊

一寒徹骨到衰年我讀公詩亦泣然垂老親虛毛義養
食貧妻累孟光賢時乖敢怨文無價困極翻同病有緣
畢竟能留遺橐在解憐此意只蒼天

莫將豪氣論縱橫百轉三腸歷半生閱盡風塵終扼腕
傳來兒女信多情思深落月悲師友怨寫飄蓬感弟兄

若箇千秋論知己香山一集是先聲

皓首空餘負負呼自將嘯傲足清娛杜陵晚節稱詩史
阮籍終年作酒徒幾卷編成材已老一鐙吟到口難餬
紅羊劫後收餘燼賸有生花筆不枯

君家東郭怕重尋回首蓬門感不禁病馬西風憐瘦骨
衰蟬落葉動商音元鐙具有傳人想寸土難埋烈士心
誰繼風騷轉惆悵手栽桃李不成陰

五載幽明悵路歧墓門宿草倩誰披方干不信能登第
君復何須更有兒貧困生前原恨事集傳身後是通時

癡情到我真應喜未必重泉尚有知

同里後學繆裕紱東霖拜草

和元

題辭

遭遇如公數太奇淒涼善忍杜陵飢衰年况復貧兼病
排悶惟將酒與詩垂老東坡猶有婦問天伯道竟無兒
只從劫火來燒後百鍊精金異昔時

慷慨悲歌氣不侔香奩佳句儘風流誰云窮苦詩方好
寫盡生平筆亦愁綫縲原非公治罪譏讒轉累貺稽憂
壯懷有志空嗟歎一領青衿到白頭

餬口生涯絳帳開鹽車十載屈君才有錢便作沽春費
無地能尋避債臺冀野名駒羞棧豆豐城神劍困塵埃

思量身後誰題墓品作詩人莫浪猜

丁仙化鶴太恩恩幾度披吟想像中筆到有神天亦妒
詩能壽世命非窮春花秋月文章富島瘦郊寒體製工
慚愧荊州余未識九原何處寄吟筒

長白仰山景賢拜稿

工詩豈獨爲窮愁雅韻深情孰匹儔我愛當時郊島筆
不因寒瘦減風流

黃楊厄閏苦侵尋把卷情懷想像深生識無緣應笑我
也將題詠附知音

生平潦倒劇堪憐
賸有遺編姓字傳
不遇元龍高氣誼
誰將鉛槧慰重泉

豈向吟壇結夙因
公然此集託騷人
死前一面恩恩甚
知否于今付手民

鳳皇掄一管
萃超拜稿

五言古

承德王乃新雪撫軍署

漢軍繆裕紱東霽園

讀長慶集

積。詩。成。萬。篇。盡。人。意。中。有。及。欲。學。為。之。咯。咯。難。出。口。非。
關。此。詩。懷。無。繼。先。生。後。總。由。情。未。真。墨。揮。旋。掣。肘。我。今。
豈。解。人。朗。吟。卯。及。酉。意。緒。何。纏。綿。把。卷。難。釋。手。事。之。如。
良。師。親。之。如。益。友。但。覺。快。心。意。勝。過。銜。杯。酒。休。問。我。所。
吟。老。嫗。能。解。否。

與李樂卿秀才醉飲

君來我已醉。我醉興轉多。一笑酒家入。觴傳如擲梭。爾
我俱年少。豪雄氣不磨。命途所抑塞。功名空望奢。看取
眼前樂。沈酣無以過。況是好天氣。春濃二月花。狂意一
回動。壚邊發浩歌。歌罷倍昏昏。閒愁奈我何。

簡施執廷秀才

晨興君卽來。夜倦君始去。一日蹤跡疏。情懷便不豫。問
君胡為然。君言行吾素。我亦數尋思。終莫明其故。夙緣
想最深。今生乃把晤。無怪相視間。莫逆多歡趣。胡為數

有奇病魔任馳驚。遂令君顛連。欲來艱舉步。酒無飲興。
酣詩廢吟情。助徙倚舊窗牖。悵如失所據。人生重心交。
交深天乃妒。何當有喜占。笑言共朝暮。快呼大白浮。舉
觥不知數。

謁北鎮廟

暫歇鞍馬勞。卽入北鎮廟。廟隨山勢高。登陟凌殘照。林
立歷代碑。鴻文皆祭告。聖主紀東巡。天章尤炳耀。吹袂
來靈風。巍然尊像教。嚇我宿酒醒。不敢舒長嘯。頭陀爾
何名。乍晤欣然笑。快登覽秀亭。

在院之西偏

相迎復相導。大